

[0]動物全書機

[1]「哥哥，你睇下我畫咗啲咩？」阿思拎咗一幅畫出嚟。  
「好叻喎，呢隻咪係老虎？我都有啲唔記得咗佢咩樣喇！話晒都絕咗種一百年……」

[2]「好彩啲人喺二零零零年發明咗一部『動物全書機』，將動物嘅相入落部機，就可以睇返動物嘅紀錄片。」喺部機開緊嘅時候，哥哥幫幅畫影咗張相。

佢一將張相入落部機，隻老虎即刻出咗嚟。哥哥搖下頭：「唉，以前啲人好鍾意買賣虎皮，所以佢哋至會絕種，仲有好多動物都係噉……」

[3]呢個時候，阿思見到佢兩個朋友——阿貓同阿寶行過，就叫佢哋過嚟一齊玩。佢哋都想睇下史前動物，諗都唔諗就過咗嚟。

[4]「點解海入邊會有把劍嘅？」阿寶入咗張相之後，阿思問。  
「呢條係『一角鯨』，佢住嘅地方好凍㗎，好似二百年前就有晒喇……」

[5]阿寶又換張相，繼續講：「呢隻係猩猩，唔好睇佢好似好傻㗎，其實佢好醒㗎！依家全世界得返一隻咋。」  
「佢同馬騮仔好似樣呀。」阿思笑住講。

[6]「到我喇！」  
「我嚟先㗎，到我至㗎！」  
「我最細個，應該係我先！」  
佢哋個個都想入相落部機度。

[7]喺佢哋仲爭緊嘅時候，哥哥靜雞雞入咗張相落去。  
有隻動物出咗嚟，個個都唔知佢係咩——又似馬，又似鹿㗎。  
哥哥笑咗一笑講：「呢隻係『獾狍』，有人話佢係斑馬同長頸鹿一齊生嘅BB，後來先知佢係長頸鹿嘅近親。」

[8]「呢次到我喇！」阿寶未講完就入咗張相落去。  
「又係你——」一隻藍色腳嘅雀仔出咗嚟。  
「呢隻我識㗎，老師嚟日有講過，係『藍腳鰹鳥』。佢哋追女仔嗰陣係會跳舞㗎！」  
阿思笑住話。

[9]突然，畫面又轉咗隻新動物。  
阿貓話：「我知呢隻叫『奇異鳥』，佢好懶㗎，日日瞓廿個鐘。不過依家再見唔到佢喇，冇晒喇！」

[10]「就嚟天黑喇，我哋睇埋最後一隻好返屋企喇——」哥哥同佢哋講。  
「呢次又輪到我喇！」阿寶指住自己。  
新動物「嚟」一聲就出咗嚟——

「呢隻叫『懶猴』，因為佢嘅眼仔可以入藥，所以啲人係噉捉佢嘅，捉到最後一隻嘅一百年前死咗……」阿寶講到有啲唔開心。

[11]世界各地每分每秒都有動物瀕臨絕種，唔想啲咁可愛嘅動物消失，你哋會做啲咩嚟保護佢哋呢？

---

**00180p:《動物全書機》Magical Machine**

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

**Attribution Text**

"Magical Machine" (Cantonese), translated by HamBaangLaang (© HamBaangLaang, 2021), is based on the original story, The Magical Glasses (English), written by Padmaparna Ghosh, illustrated by Sayan Mukherjee, published by Pratham Books (© Pratham Books, 2018) under a CC BY 4.0 license, first released on StoryWeaver. Read, create and translate stories for free on [www.storyweaver.org.in](http://www.storyweaver.org.in)

[Find out more here: [HamBaangLaang Attribution terms and CC 4.0](#)]

---